

## Uunga siunnersuut:

### Avatangiisit innarlitsaaliorneqarnissaannik Inatsisartut inatsisaata allangortinneqarnera pillugu Inatsisartut inatsisaat

(Aatsitassanut inatsisinut tunngasunik erseqqissaaneq, pineqaatissiisarnermut aalajangersakkanik allanguineq, eqqagassanik eqqussuinissamut periarfissat annertusisat, mingutsitsinernut maannamut maleruagassiuiiffigineqarsimanngitsunut iliuseqarnissamut periarfissat, aalajangiinernik allanguinissamut utertitsinissamulluunniit periarfissanik annertusititsineq il.il.)

## § 1

Avatangiisit innarlitsaaliorneqarnissaannik Inatsisartut inatsisaanni nr. 9-mi, 22. november 2011-meersumi, Inatsisartut inatsisaatigut nr. 1-ikkut, 29. maj 2012-imeersukkut aamma Inatsisartut inatsisaatigut nr. 10-kkut, 27. november 2018-imeersukkut allanguuteqartinneqartumi uku allangortinneqarput:

1. § 4 ima oqaasertalerneqassaaq:

” § 4. Inatsisartut inatsisaannut sulianut, kalaallit aatsitassarsiornermut inatsisaannut ilaatinneqartunut atatillugu avatangiisit innarlitsaaliorneqarneri ilaatinneqanngillat, taakkunungalu maleruagassiuneq, nakkutilliineq, upalungaarsimaneq akiuiniarnerlu ilanngullugit.”

2. § 33-mi imatut oqaasertalerneqassaaq:

” § 33. Kapitali manna naapertorlugu suliani tamani Naalakkersuisut kommunalbestyrelsimut, Nakorsaaneqarfimmut aamma Kalaallit Nunaanni Nersutit Nakorsaqaarnermi Inuussutissalerinermilu oqartussaasunut tusarniaareerlutik aalajangiisassapput.”

3. § 38 imatut oqaasertalerneqarpoq:

” § 38. Kalaallit Nunaannut eqqagassanik eqqussinissaq inerteqqutaavoq, taamaattorli imm. 2 takuuk.

*Imm. 2* Eqqagassat pineqartut annertussusaannut suussusaannullu passussinissamut Kalaallit Nunaanni naammattunik periarfissaqartoq Naalakkersuisut naliliippata, Naalakkersuisut eqqakkanik eqqussinissamut akuersissuteqarsinnaapput. Inissinissaq siunertaralugu eqqussinissamut akuersissummik tunniussisoqarsinnaanngilaq taamatullu eqqagassanik navianartunik eqqussinissamut akuersissummik tunniussisoqarsinnaanani.

*Imm. 3.* Nunanut, nunat killeqarfii akimorlugit, eqqakkanik navianartunik assartuisarnermi taakkualu iginneqartarnerisa nakkutigineqarnerat pillugit Basel-imi isumaqatigiisummumt ilaasunut eqqakkanik nunanut allanut taamaallaat aallarussisoqarsinnaavoq.

*Imm. 4.* Nuna eqqussivissaq imaluunniit nunat akunniffissat eqqakkanik tiguserusunnginnissaat tunngavissalimmik ilimagineqarpat, Naalakkersuisut eqqakkanik avammumt nassiussinissamut inerteqquteqarsinnaapput.

*Imm. 5.* Naalakkersuisut eqqakkanik eqqussisarnermut avammullu nassiussisarnermut maleruagassanik aalajangersaasinnaapput.”

4. Kapitali 7 kingorna ikkunneqassaaq:

**“Kapitali 7 a**  
*Mingutsitsinerit allat*

§ 40 a. Naalackersuisut nukissiuutit, akuutissat atortussalluunniit sulianit pisut, Inatsisartut inatsisaanni aalajangersakkanut allanut ilaanngitsut atorlugit mingutsitsinissap pinaveersaartinnissaanut akornusernissaanullu maleruagassanik aalajangersaasinnaapput, peqqussuteqarsinnaapput imaluunniit inerteqquteqarsinnaapput, kiisalu piumasqaateqarsinnaallutik, suliat taakku inatsimmut allamut ilaanngippata.”

5. Kapitali 11-ip qulequtaa imatut oqaasertalerneqassaaq:

*”Attaveqaqatigiinneq tamanullu ammasumik saqqummiussisarneq”*

6. § 48 imatut oqaasertalerneqassaaq:

” § 48. Inatsisartut inatsisaat malillugu akuersissutit, akuersissutinik tunniussinissaq allanilluunniit aalajangiinissaq nalunaaruteqarnissarluunniit sioqqullugu Naalackersuisut innuttaasunik attaveqaqateqartarnermut, tamanut ammasumik saqqummiussisarnermut tamanillu akuutitsisarnermut maleruagassanik sukumiinerusunik aalajangersaasinnaapput. Aamma Naalackersuisut Inatsisartut inatsisaanni suliassaqarfinnut tunngatillugu pilersaarusiormi tamanik akuutitsinissamut maleruagassanik aalajangersaasinnaapput.

*Imm. 2.* Naalackersuisut imm. 1 naapertorlugu innuttaasunik attaveqaqateqarnermi kiisalu tamanut ammasumik saqqummiussinermi aammalu tamanik akuutitsinermi taamaallaat atortut digitaliusut atorneqarnissaannut maleruagassanik aalajangersaasinnaapput.”

7. § 53, imm. 1-imi naggatip appaattut ikkunneqassaaq:

”Nalunaaruteqartussaataaneq taanna Inatsisartut inatsisaat imaluunniit taanna tunngavigalugu maleruagassiat aalajangersarneqartut uniorlugit suliaq mingutsitsinermik kinguneqarpat imaluunniit tamatumunnga ulorianartorsiortitsippat atuutissaaq.”

8. § 53, imm. 1-ip kingorna immikkoortoq nutaaq una ikkunneqassaaq:

” *Imm. 2.* Nunaminertami mingutsitsisoqartoq paasineqarpat, nunaminertamik atugassinneqarsimasoq imaluunniit atuisinnaatitaasoq erngerluni nakkutilliinermut oqartussaasunut nalunaaruteqassaaq.”

Tamatuma kingorna *imm. 2 imm. 3-nngorpoq.*

9. § 54-ip kingorna ikkunneqassaaq:

” § 54 a. Inuk imaluunniit suliffeqarfik nakkutilliinermut oqartussaasunut ilisimatitsinissamik kissaateqanngippat, suliap Kalaallit Nunaannut eqqartuussisarneq pillugu inatsit naapertorlugu misissuinerup ingerlaqqinnissaanut atugassatut Kalaallit Nunaanni Politiinut tunniunneqannginnerani pineqartup akiligaanik nakkutilliinermut oqartussaasut pisariaqartinneqartunik misissuissapput, Inatsisartut inatsisaat imaluunniit taanna tunngavigalugu maleruagassiarneqartut unioqqutinneqarsimanersut misissuiffigalugu.

§ 54 b. Inatsisartut inatsisaanni matumani maleruagassat naapertorlugit nakkutilliinermi akulerunnermiluunniit nakkutilliinermut oqartussaasut uppenarsaatissanik assiliisinnaapput, assileeqqissinnaapput tiguisinnaallutilluunniit imaluunniit pigisanik allanik tiguisinnaallutik. Allagaatit pigisallu tiguneqarsimanerinit atsiorneq tunniunneqassaaq. Allagaatit pigisallu misissueqqissaarnermut atorneqartussaangitsut misissuinermit kingusinnerpaamik ulluinaat 14-it qaangiutsinnagit suliffeqarfimmut utertinneqassapput.”

10. Kapitali 13 kingorna ikkunneqassaaq:

**“Kapitali 13 a**  
*Aalajangersakkat allat*

§ 59 a. Avatangiisit eqqarsaatigineqarnerini imaluunniit nunani tamalaani isumaqatigiissutit malinniarneqarnerini pisariaqartinneqarpat, Inatsisartut inatsisaat manna imaluunniit avatangiisinik innarlitsaaliuinermit maleruagassaasimasut naapertorlugit akuersissutit tunniunneqartut, akuersissutit aamma immikkut ittumik akuersissutit allanngortinneqarsinnaapput utertinneqarsinnaallutilluunniit. Allanguineq utertitsinerluunniit sapinngisamik tamatumunnga piffissaliussamik naammaginartumik malitseqartinneqartassaaq.

*Imm. 2.* Imm. 1 akuersissutinut, kapitali 5-imut ilaatinneqartunut atuutinngilaq.”

11. § 66 imatut oqaasertalerneqarpoq:

” § 66. Akiliisitsinermik pineqaatissinneqarsinnaavoq:

1) § 35, imm. 3, § 52, aamma § 54, imm. 1 aamma 2 malillugit peqquneqarnerminik malinninngitsaq.

2) § 53, imm. 1 aamma 2 naapertorlugit nalunaaruteqanngitsoortoq.

3) § 19, imm. 1 aamma 3, § 31, imm. 2, § 32, imm. 1 aamma 2, aamma § 38, imm. 2. naapertorlugit akuersissummik pissarsiniangitsoortoq.

4) § 16, § 17, imm. 1-3, §§ 20-23, § 25, § 30, § 36, imm. 4, § 38, imm. 4, § 40 a, § 49, imm. 5, § 50, aamma § 54, imm. 3 naapertorlugit peqqussuteqarnermik, inerteqquteqarnermik piomasqaateqarnermilluunniit unioqutitsisoq.

5) § 15, imm. 1 aamma 2, § 28, imm. 2, § 37, § 38, imm. 1 aamma imm. 3, § 41, imm. 1, § 53, imm. 3, aamma § 64, imm. 1-inik unioqutitsisoq.

*Imm. 2.* § 35, imm. 1-imik unioqutitsisoq akiliisitsinermik pineqaatissinneqarsinnaavoq, eqqagassaqalersitsilluni, eqqagassanik uninngatitsilluni, assartuilluni, suliaqarluni imaluunniit eqqakkanik eqqaalluni:

1) allat peqqissusaannik navianartorsiortitsisoq, imaluunniit

2) silaannarmi, imermi, sermimi, qaqqami imaluunniit nunami mingutsitsisoq.

*Imm. 3.* § 10, § 18, § 19, imm. 4, § 27, § 34, § 36, imm. 3, § 38, imm. 5, § 40, § 40 a imaluunniit § 42 naapertorlugit akiliisitsinermi akisussaasuusaq pillugu maleruagassanik aalajangersaasoqarsinnaavoq.”

**§ 2**

Inatsisartut inatsisaat manna atuutilerpoq ulloq xx.xx.xxxx

*Namminersorlutik Oqartussat, ulloq xx.xx.2021*

Naalakkersuisut Siulittaasuat